

## Guslajte "junaci", laž je opijum za narod



Mustafa Cerić

Postoji mnogo vrsta laži. Mnogo više nego opijuma. Laž heroína je teška droga. Po djelovanju pripada umopioidima. Ima velike mogućnosti za razvoj ovisnosti. Ako se sluša svaki dan, ovisnost se razvija za nekoliko dana. Djeluje za nekoliko minuta nakon slušnog ušmrkavanja. Uzeta intraslušno, laž heroína djeluje trenutačno i izaziva osjećaj euforije.

Postoje i druge teške i lahke droge laži: laž za samo-uveseljavanje; laž za uveseljavanje drugoga; laž za smijanje; laž za plakanje; laž za slikanje; laž za povraćanje; laž za varanje; laž za inat; laž za fesat; laž za prijetnju; laž za smetnju; laž za svađu; laž za krađu; laž za progon; laž za pogrom; laž za klanje; laž za ubijanje; laž za genocid.

Neke laži su usmene, neke su pismene, neke su nepismene, neke su smišljene - sve laži su izmišljene. Neki se bolje opiju dok šmrću usmene laži. Neki se izgube dok umrknuju napisane laži. Ni teleprompter im ne pomaže. Vido sam onomad jednog i slušao ga u Staroj Gradiški. Zbunio se dok je vikao na sve koji nisu došli u Jasenovac, ali i na one koji su došli.

Svim žrtvama genocida u Jasenovcu i u Srebrenici ja odajem iskrenu počast.

Nepismena laž je opijum sa velikom dozom opijenosti. Pogotovo kad se šmrka na televiziji, poput jednog člana predsjedništva sinoć na TV1. Veli, zakazani referendum u manjem bosanskom enitetu je neodgodiv. To je srpski inat, kao odgovor na bosanski inat - inat srpske laži protiv inata bosanske istine. A istina je: nisu u Bosni Srbi svi i svuda [pace Vuk Karadžić]; u Bosni su Bosanci svi i svuda.

Deveti januar ostaje dan državnosti "srpske" bez obzira šta drugi mislili i uradili u Bosni, veli član predsjedništva države Bosne i Hercegovine i ne trepnu okom. Inat je to srpski na inat bosanski. I sve će biti veći i veći ako bosanski inat bude inzistirao da Srbi odustanu od svog lažnog inata, veli on na TV1. Pečevši od inata crkve u Fatinom dvorištu, inata antibosanskog jezika, inata negacije srpskog genocida u Srebrenici, pa sve do inata referenduma, Srbi neće posustati. Oni će gonit svoj inat pa kud puklo da puklo. Veliki su to inati za srpsku svetu slavu da bi Srbi pristali na bosansku istinu. Oni su jednostavno opijeni svojim lažima za inat. Zato je inat srpskog referenduma neodgodiv. Jer, ako "dragovoljno odustne" od referenduma, onda je to njegov kraj u politici, a ako odustane od referenduma pod pritiskom OHR-a, onda je to njegova pobjeda.

Ma, čuješ, neka i to bude: neka pobijedi i neka ga nakon poraza referenduma svi Srbi veličaju svuda. Nama to ne smeta, jer smo se navikli na srpske slave poraza. Poraz referenduma bio bi samo još jedan u nizu slavni poraza o kojima pjevaju srpski guslari. Po broju proizvedenih laži za inat on zaslužuje da bude među prvim junacima za guslanje.

No, najveća od svih je laž za slikanje. Ova laž je teški opijum. Teži od svih. Svojtven je prvom u Srba, koji reče u Staroj Gradiški da se neće miješati u unutrašnje poslove Bosne. Ova laž nije samo za slikanje, već i za smijanje. Ali, i za povraćanje od prevelike doze morfija u njoj. Od ove laži postaju ovisni ne samo oni koji je konzumiraju, već i oni koji su naivni. A naivnih u Bosni nije nikad ne nedostajalo. Sve ih je manje, ali ih

još podosta ima. Valja im se liječiti od te opake ovisnosti. Valja nam se svima u Bosni liječiti od ovisnosti opijajuće laži, koja se ovih dana širi Bosnom. Upotreba droge heroina je zakonom zabranjen, ali ovisnici o heroinu laži su neumoljivi. No, ipak bi trebali znati da je laž za klanje, ubijanje i genocid u Bosni zauvijek poražena.

Inatite se koliko hoćete, ali na vaš račun.

Nikad više na naš!

Bosna se otriježnila od opijuma laži!

Bosna je budna i kad spava!

S vama ili bez vas!

**Mustafa Cerić**